

Gabinete di Aruba cu un bunita homenahe na Hubert (Lio) Booi

DEN HAAG – Durante un encuentro den Sala Padu na Gabinete di Minister Plenipotenciario a tuma luga un homenahe na e gran baluarte di cultura di Aruba Hubert (Lio) Booi d.f.m.

Den presencia di Minister Plenipotenciario Alfonso Boekhoudt, Minister Plenipotenciario suplente di Curaçao Robert Candelaria, directora di Gabinete di Aruba Shandra John, Lidwina Booi, yiu muhe di Hubert Booi y un sala yen di invitadonan, Mirto Laclé a tene un presentacion elocuente 'Recordando Hubert (Lio) Booi'. E presentacion cu hopi potret for di e album priva di famia Booi a duna un bunita impre-

sion di subida y su amor pa e cultura Arubiano. Despues di e presentacion di Mirto Laclé a pasa e film 'Nos ta canta'. E documentario aki ta rindi homenahe na cuater icono musical Arubano. Traves di entrevistanan cu cuater persona conoci den e mundo di musica di Aruba cu ta Maybeline Arends Croes, Digna Laclé Herrera, Carmen Herrera y Tica Giel, ta muestra e importancia di e cancionnan tipico di Aruba y e rol cu nan ta hunga den nos herencia cultural.

Finalmente Mirto Laclé a haci entrega di un buki di 'Nos ta canta' na Minister Plenipotenciario Alfonso Boekhoudt y directora di Gabinete di Aruba Shandra John. Dos escritor Arubiano



cu ta Olga Orman y Quito Nicolaas tambe a haci entrega di nan ultimo publicacion na Sr. Boekhoudt y Sra. John.

Olga su buki di poesia Cas di Biento ta contene poesianan na tanto Papiamento como Hulandes. El a skirbi nan

pa gran parti na Hulanda y tambe na Aruba y Curaçao. E poesianan di Olga ta ilustra un gran envolvimento y su relacion cu loke ta pasa na su isla natal.

Quito Nicolaas su buki 'Cucuisa Cabisha' ta un seleccion pa Fred de Haas di 42 poesia for di e cinco buki di poesia cu Quito Nicolaas a yega di skirbi. E contenido di e poesia nan ta muestra hopi cla cu e escritor ta sigui e sucesonan na Aruba hopi di cerca.

Sigur un bunita anochi literario y cultural unda a brinda homenahe y a recorda na un gran baluarte di cultura di Aruba. □

